

摘藻堂四庫全書薈要

集部

欽定四庫全書薈要卷一萬三千六百十六

集部

陳拾遺集卷五

唐 陳子昂 撰

碑文

昭夷子趙氏碑

昭夷子諱元亮字貞固汲人也本居河間世為大儒至祖揆尤博雅耽道隋徵入學士與同郡劉焯俱至京師補黎陽郡長始居汲焉有二子禮輿禮輶輿官至臨潁

縣丞轅為校書郎並著名當代昭夷禮輿季子也元精  
冲懿有英雄之姿學不常師志在遐遠年二十七褐衣  
游洛陽天下名流翕然宗仰羣蒙以初筮求我昭夷以  
玄穀發機故蓬居窮巷軒冕結轍時世議迫阨不容其  
高乃屈身泥蟠求祿下位為幽州宜祿尉到職逾歲默  
然無言唯採藥彈琴詠堯舜而已州將郡守穆然承風  
君之道標浩如也因巡田入隴山見烏支丹穴密有潛  
遁之意蒼龍甲申歲在大梁遭命不造發痼疾而卒時

年四十九嗚呼哀哉天下士人聞之知與不知莫不為之垂涕蓋傷其有濟世之量而無長世之年夫上德道全器無不順中庸以降才好則偏有張也之莊無展也之道好由也之勇緬回也之仁侈宰予之言遺澹臺之行務端木之智忘甯武之愚或正而不奇或達而過雜君獨五味足六氣和通衆賢之不兼暢羣才之大適雖不至於聖道其殆庶乎故人無間言物飽其義吾嘗論人事有十君得其九一不至者命也夫於戲名聞天下

而不達於堂上智周萬物而不適乎一人也其時歟其  
事歟君故人雲居沙門釋法成嵩山道士司馬子微終  
南山范陽盧藏用御史中丞鉅鹿魏元忠監察御史吳  
郡陸餘慶秦州長史平昌孟詵雍州司功太原王適洛  
州參軍西河宋之問安定主簿博陵崔璩咸痛君中天  
鼎飪不實百代祀德故老或云以為名者德之表謚者  
行之跡君囊括世道屯位明艱困乎艱晚光景不耀乃  
共稽陟舊行考謚定名問於元著象曰明夷吁昭夷昔

歎才位不兼大運有數常哀時命而作頌云諸公以余  
從君之遊最久故秉翰參詳叙其頌曰人道宏運兮物  
各有時匪時不生兮匪運不成昔者元精回滴陽九滔  
灾大人感生堯禹恢能陰陽既和玄帝傳家五百數終  
桀驚暴邪子乙提運水火革期匪賢不昌尹乃阿衡六  
百運徂受始淫狂西伯考元厯在躬昌匪雄不決匪謀  
不臧姜牙皓首實逢其良投釣指麾奄有八荒周有天  
下七百餘年太公之後不聞大賢豈無仲尼負道周旋

無勢一契無土一厘然則大運之所來時哉時隘  
業隘運巨功巨苟非其時草木為伍昭夷作頌爾又嘗  
著汲人默記言變化之事且曰清爾靈龜永晏息乎浩  
初

臨邛縣令封君遺愛碑

叙曰蒼生蚩蚩其動也直蓋顓蒙乎聖人顓顓其汲也  
汲也下疑有脫誤教務王皇中乎則時至其理道之君公弼其

機馭之師之非能駿尊上帝保乂黎元雖則荷天之寵

析人之爵行其禮樂驟覩於中和裕其廉平載聞於謠  
訟我之遺愛者不從事於是邪嘗試論之公名某字某  
渤海蓆人也昔后稷有德於邵文王受圖於鎬珍符冊  
命始自於西周珪社建侯奄荒於東土裘鼎軒冕有家  
代焉曾祖子繡齊潁渤海三郡太守霍州刺史隋通直  
郎通州刺史榮分麾蓋道遇循良時雨洽於齊陳惠風  
被於唐楚祖德為北齊著作郎隋扶風郡南陽縣令芸  
局觀奧見天下之圖石柱聞琴知君子之化父安壽皇



朝尚衣直長懷州司馬亳州刺史湖州刺史良二千石  
聞乎共理之尊肇十二州策多刺舉之首公則使君第  
某子也冲和誕命光大含章實公侯之子孫有山河之  
氣象明不外飾默昭於玄機敏實內融養蒙於用晦故  
其廉不直物恕必由衷崇善足以利仁自彊足以從事  
有朋友之信焉有閨門之肅焉非夫恭人其孰能景行  
行之者也年始若干為國子生言從太學之遊以觀先  
王之道某年以明經擢第解褐守恒州叅軍秩滿補許

州司法參軍許惟舊國陳實多巫君子豐明利用乎獄  
載以課最累加秩焉又轉洺州司兵參軍藁臺悅服一  
旦成市非利器者政以多荒公實佐之官無留事信矣  
乎能其理者有其任濟其業者享其功我豈蒙求物思  
其理某年選補臨邛縣令夫蜀都天府之國金城鐵冶  
而俗以財雄戈獵田池而士多豪侈此邦之政舊難其  
人公按轡清途下車而宰覽其謡俗永歎於良圖想其  
風流慨然于惠化以為太上之理因人者也通變之機

隨時者也必使無訟不亦由吾用乎利貞夫何在物於是謀其教令肅其儀刑敬其事以順其人正其聞以利其義以為昔者聖人之務本也在乎稼穡有稼穡然後可以養人故公之勸人也用天之道分地之利以為昔者聖人之利用也實在財貨有財貨然後可以聚人故公之化居也貿遷有無和其衆寡以為昔者聖人之事生也謹其制度然後可以富故公之節用飲食有節車服有數以為昔者聖人之事死也慎其喪祭有喪祭然

後可以睦人故公之送死也葬之以禮祭之以禮以為  
昔者聖人之用獄也崇其法制有法制然後可以禁人  
故公之恤刑也唯齊非齊有倫有要夫如是者豈苟其  
利哉惟欲潔乎其源正乎其本慎之於謀始要之於用  
終將使紋黻矯虔由是以息孤寡不穀由是以寧者哉  
夫然後磨之以仁琢之以義使男女異路班白不提熙  
乎其若春肅乎其若神然後文以禮樂幾乎以淳朴道  
豈遠乎嗚呼旻天不悅降此荼毒某年以太夫人憂去

職于時公之莅始逾年矣然一載考績是用未成百姓  
哀惶人吏嗟咨怨咸云我父矣而人悴矣鄉望老人前  
某官等五百餘人或金隄之秀玉宇之英而服美於寬  
允嚴祇於教義遂走之州府訴之上官冀奪其哀推禮  
終秩不謀而同者日有百數司馬元公帝王之胄也康  
歌協化盛德在人憫烝庶之求思嘉我君之懿績以為  
古之借冠者何以踰是哉遂用疇咨舊章允懷眊誦奪  
之公禮上之于文昌臺非將協贊天工慰彼黎庶君子

之教而日見之哉斑白之老胥史之徒又以天子在宸  
勤必孝理我君云邁誰其嗣之千餘人復連表詣闕投  
匭乞君以墨纁從事遑遑焉若有望而未至也鬱陶增思  
寤寐永歎將欲思謨不朽想見懿德乃相與言曰昔者  
君子思其人而愛其樹蒙其澤則歌其詩封君之仁我  
無金石乎又述其行狀訪余以銘勒之事縣丞等有弼  
諧之美刀筆之能永思清風歎息仁化尉安定梁慎盈  
知名之士也墨妙幾於草聖文義總於辭雄昔仕京畿

左遷此職自以為贊封君之化有日矣承封君之德有  
年矣夫其忠信之教寬猛之機古之官人君其殆庶乎  
父老之請允矣余竭來舊國傳據其實恭聞其去思而  
親覩其遺愛余所備者敢博斯文猶懼後生有言以為  
口實河東薛稷隋內使公之孫也文章之伯而時所宗  
故憑其實錄寄之為頌其詞曰天地之間有渤海焉伯  
宗伯谷神山在焉精氣飛騰生良宰焉良宰寔生代祿  
代卿君達好遺風雲上征武興察孝州郡有聲陳其弓

治戴其簪纓坐仕斯邑我龜觀貞深期高悟絕策遠明  
既至肅肅其來英英臨事若祭視人如嬰三農慙用折  
獄以情輕重共用穀貨以平我裳既襲我簋斯盈於惟  
我君張仲孝友家膺五福堂享三壽溫清不違喜懼無  
守枯魚御素疾風過牖匪降自天誰執其咎棘心劬勞  
匪莪伊蒿彼蒼不弔惟其永號借寇為請惠此噉噉曾  
是奔告謂天蓋高昇仙橋下赤車使者客於臨邛文雅  
雍容觀風萬里謁帝九重嗟嗟其舊椎牛擊鐘門於君



墨借翰雕龍專思君兮不返伐石登山山高兮望遠懷  
車馬於言告欲絃歌於言偃人寔去思我無愧詞

續唐故中岳體玄先生潘尊師碑

尊師業尚沖密勤志幽深理心事天所保惟嗇絕聖棄  
智不耀其光故真盛冥期珍圖祕學性與天道不可得  
而聞也若乃崇標曠迹遐情遠意志摩青雲蓬視紫闥  
高宗每降鑾輦親詣精廬尊師身不下堂接手而已每  
歎曰大丈夫業於道不能投身霄嶺滅景雲林而疲疴

此山以煩世主吾之過也遂欲東求蓬萊孤舟入海屬  
天皇敦篤斯道祈歎逾深踟躕山隅絕策未往既而金  
革有命鑣轡遺區於戲昔孤射有神人堯輕天下崆峒  
有至道軒后順風玄冥高蹤萬古同德何其盛哉尊師  
有弟子十人並仙階之秀然鸞姿鳳骨眇愛雲松者惟  
潁川韓法昭河內司馬子微皆稟訓瑤庭密受瓊室專  
太清之業遺下仙之傳谷汲芝耕服勤於師蓋歷歲紀  
也始尊師受錄於茅山昇玄王君王君受道於華陽隱

君陶公陶公至子微二百歲矣而玄標仙骨雅似華陽  
夫階真蹈冥練景遊化者其必有類乎法昭等永惟尊  
師靈跡洞業高深邁古而棄世往矣其若之何乃斲石  
幽山申頌立德其頌曰觀元化兮求古之列仙得瑤圖  
與金鼎信元符之自然神與道而惟一天與人兮相連  
苟精守以專密必駕景而凌烟丹丘不死兮羨門弟子  
黃宮度世兮吾體吾玄體玄之至德兮洵淑美沖心養  
和寶元始初學茅山濟江水乃入華陽洞天裏道逢真

人昇玄子授以寶書青台旨令守崧山玉女峰雲栖窮  
林今五紀聖人以萬機為貴而我以天下為累聖人以  
大尊為尊而我以天下為煩是以冥居於崐崘寄遺跡  
於軒轅有唐高宗今天子之光好道樂仙思雲鄉千旌  
萬騎兮翠鳳凰邀我汝海兮箕山陽朝拜白茅夕紫房  
齋心潔意緬相望祈問玉真及玉皇何以得之受天昌  
黃庭中人在子身實實冥精一作甚真去汝驕氣與  
淫神勤能思之道自親遂解形而遺世乘白雲以上賓

弟子不知其所如也乃刻石以思其人

漢州雒縣令張君吏人頌德碑

至哉天子在穆清之中端玄默之化萬國日見百姓以親誰其昭宣令長其任也然則國有小大政有污隆遭其和平則循理之功易值其凋瘵則革弊之業難況罹乎荐瘥救其塗炭力倍於中而功不半之則盡其仁而澤未全洽惟我府君當欽明之世承苛慝之蓋緝頽靡之餘遂能撫寧矜殘淳耀敦懿改制立憲昭德顯仁奇

跡光乎曩賢惠風穆於茲日我行千里而得一賢傳曰  
夫用我者而豈徒哉府君姓張氏名知古蓋漢少傅留  
侯之裔也昔留侯得滄海力士東遊於秦遇黃石老人  
西歸於漢山河鐘鼎子孫保之世在關中今為宜州人  
也高祖藝周恒州司馬曾祖歡隋許州司馬祖雄唐并  
州榆次令考琳原州平原令皆稟瑚璉之器著經濟之  
才大位不躋元德滋茂其昭祉復襲於我府君府君體  
英竒之姿沖希默之量齊敏內肅端簡外融夫其孝友

睦嫻研幾成務深斷守節之固撥煩簡要之能在於家  
邦聞其政矣起家補同州朝邑尉歷大州鄭縣尉左金  
吾衛倉曹叅軍洛州洛陽主簿黃圖左翊豪俠所湊赤  
墀佐理寔賴其能又遷雍州明堂縣丞時皇帝恭默明  
臺清問下吏西南矜寡有詞上官曰刺史胥貧而苛縣  
令威施而忍奸宄因釁羣行致數哀哉毗黎顛在荼毒  
朝廷憫之帝曰俞允哉乃用勅撫此荒邑噫嘻昔者苛  
政未作封境保安茲都衝要矜帶全蜀百濮兼錯萬裔

之泉寶利珍貨盡四海矣殆殘猛聿至蟲賊內訌始於  
碩鼠之侵終屠餓狼之喙杼軸既盡郭邑殆空悲夫仲  
尼云苛政虐於猛虎豈猛虎而已哉我府君殷然始宣  
皇明恭職事巡省黃髮周爰令圖所以綏亡固存蠲虐  
去暴與百姓更始者輿人斐然乃作誦曰我有聖帝撫  
令君遭暴昏桮惇寡紛民戶流散日月曠君去來兮惠  
我仁百姓蘇矣見陽春然不躬不親庶民不信於是府  
君知人散久矣黷於詐罔已曰未遂躬六曹之務先五



美之訓下官斂手牟食革心人始翕如也初官戶在版  
圖者萬有五千餘家歷政侵殘逃者過半歲月永久廬  
井湮蕪蠪蛸在堂蟋蟀空嘆先是有勅天下逃人歸復  
舊業者免當年租庸公以柔遠能邇政之大端乃下令  
曰於戲天子誠憫斯人是用命我其訖有濟若逋不及  
惠幽不能明吾之罪人部内有逃越他境能相率歸者  
免一歲租及征徭若惇嫠貧窶不能自濟者當別議優  
之其長正耆老可明喻此誠使被幽谷令既下克已示

信或有逃者引首而歸公親循寧耐瞻理其業於是小  
大悅賚遠近承風四封諸道一朝景附夫負妻父戴子  
荷蓑提笠首尾郊郭者凡七千餘家熙乎若鴻鴈之得  
春也既至矣則勞來之既止矣則安緝之或三年或十  
年舊館已無喬木猶在公緝屋塗室雖陌阡為其井  
疆人得其居矣田畷失業農野榛荒此邦膏腴利在江  
浸有金鴈白魚二水是其朝雲澤麓無虞溝畛填塞公  
濬其塗洫川澮始通人得就耕矣流亡初復貧鞠兼半

食不餬口力未贍農公又假富資貧耦耕分種助其鉅  
刈歲以有年人得其食矣曩者征税橫攷商旅不行貿  
遷有無厘肆半絕公阜其貨財交易復通日中噬嗑人  
得其利矣乃種樹畜牧蠶魚工賈什伯之器車服之庸  
婚姻之時喪祭之禮莫不盡為度數制其權衡征賦既  
均千室如一於是百姓允賴鼓舞而歌其歌詩凡六章  
題曰逃還樂其章首蓋言天子之德也其二章憫前政  
之虐也其三章喜公惠之至也其四章言逃還之樂也

其五章美公化行而奸慝不興也其六章善政令平均  
賦歛不淫也時日月會于龍狔歲功成平孟冬百嘉備  
烝品物咸乂府君乃稽版籍攷幽明親巡乎邦廬存問  
乎鰥耄黃耆稚齒山原之民乃接手賡歌迎擁馬首累  
乎道路者以百千輩晝肆酒夜聯燭羣舞蹈詠迎途餞  
郊皆歌前六章慶公惠也是以封內歡康境外萌動企  
仰德美有若神明府君嘗因公事至成都成都之民駕  
肩相矚蓋藉甚其異也封人有喪者廬于墓側鞠然在

疾負土成墳公親從寮吏弔其苦蓆自是禮讓行焉學  
校興焉長史河南竇公旌別尚賢廉簡居政以公甄理  
頽弊躋美中和歷政逋亡一朝狎至遂表其狀奏之于  
闕庭屬獫獍孔亟戎車未暇郊壘既夷邦憲清穆刺史  
南陽張公幘幘卧理寬猛以濟儒術兼優吏畏獨坐人  
歌來暮甄綜品鑒物無遺才又以公保邦乂民勝殘去  
殺重理前秩昇聞宸扆夫升聞者豈循良而已哉蓋激  
清勵貪聳善懲惡祈元嘉命優公寵章於是鄉旄邦彥

華髮杼首或名淹王壘家擅銅山如王弘馬靖等若干  
人皆以政治仁顯功著頌宣揚金帛嘉止不日而至至  
則國肥矣去則民瘠矣凡我邦族其將疇依兄弟睦親  
不可以從往也筐篚玉帛不足以永貺也隔千里而不  
昧與百姓而長存非刻金石列圖象揚弘懿崇耿光則  
顯然衆情孰克慰滿於是乃從旅鑿巉巖自金水之山  
得玉玖之石農夫田婦担扛力運皆懼公往遺像莫瞻  
共琢之磨之議之謀之子昂時因歸寧采藥岐嶺父老

乃載酒邀諸途論府君之深仁訪生祠之故事永我以  
典禮博我以文章夫千里一賢義者所貴今百城一理  
公獨有之不熙其烈光以示當世則孱弱者胡以激節  
貪垢者曷以悛心敢因此義及氓謠而作頌曰

闕

九隴縣獨孤丞遺愛碑

彭州九隴縣丞獨孤君有恭懿之行果毅之才臨官以  
莊敬事而信清名苦節勤恪勵躬廉而不矜利以不浼  
有特立之操焉在位四年無一日自倦精專力務澤潛

氣通天彭之人陶然大化居秩歲滿單車告歸邦思其  
仁國詠遺愛乃樹碑刻石追崇厥庸既頌歎之又思福  
之以金仙世尊慈善萬物遂貢金鑄像祈祉冥休悠悠  
之人至今稱賴夫官不必貴政惟其才獨孤丞上迫宰  
君下雜羣尉文墨教令不專在躬然力行務仁推誠愛  
物謳吟者不歌其宰頌議者必歸於丞豈欺也哉吾每  
聞一言可以永寧天下者在能官人而已苟謬其任綱  
維以頹感獨孤丞智效一鄉惠孚百里況其大者乎於



戲官人哉乃作頌曰於維國家建官以理得人則盛匪  
人則圯英英我君清節素履恭寬敏惠將順其美禮寔  
在躬人以知恥歲秩其暮薄言歸止祁祁吏人何嗟及  
矣涕戀沱若遺愛罔已瞻德樹碑造真祈祉不有其惠  
孰能享此悠悠彭門千載有紀

唐故朝議大夫梓州長史楊府君碑

君諱越字復珪弘農仙掌人也其先帝高辛氏之裔周  
有天下晉受其封至宣公伯喬草基楊若乃彤弓旅矢

巨鬯赤第則禮命之樂歌之崇天王之寵光保元侯之  
休祉其後十六代有楊實者天錫黃鳥授以白環若曰  
命君子孫世登三事迨震秉彪賜四代三公烈光昭于  
漢室盛德充於海內金圭銘鼎至今為弘農世家也高  
祖椿魏尚書右僕射開府儀同三司司徒公進位太保  
加侍中給後部鼓吹致仕歸邑賜安車駟馬傳制二人  
可謂國之元老帝之師臣功成名遂社稷之寶曾祖思  
善齊通直散騎常侍祖敬通鎮遠將軍鄭州治中烈乎

名節公即芮城府君之第二子也少而沖嶷苦節貞素  
禮非玉帛室有琴書聞少連之風而悅之庶乎身有權  
行中清上以察乎道下以敦乎物不應州郡之命而有  
金玉之心嘗歎曰以明月珠彈干仞雀吾不能也於是  
觀寶龜之象心滅朶頤探金虎之爻志存幽履遂去家  
遁于嵩山經十餘年丹山白雲之志眇然矣屬太宗文  
武聖皇帝初臨天下物色幽人焚山膀道網羅遺逸君  
子若曰天下有道可以見矣於是始以角巾應命褐衣

詣闕陳大道之宏謬論至公於天下帝曰俞爾言乃可  
底行若歲大旱用汝作霖雨今南山近塞北漢連胡石  
州邊烽皇化未謐汝往欽哉輯乃人禦乃敵以息匈奴  
之患始解褐授石州方山令樽俎在堂干旄在階布大  
信於獫狁戎示折衝於衽席威名震曜乃昇聞也有勅授  
憲臺監察御史繡衣始拜珥筆昇朝臺閣以之生風豪  
貴由是斂手又勅直中書待制未幾又遷秘書郎直中  
書省如故遊鳳凰之池觀蓬萊之府是天下之榮踐也

又轉宗正寺丞歲餘帝思南史之才將崇東觀之美又遷起居郎加騎都尉龍朔中天子將觀兵於東夷以復先帝之業凡居中者多出守旁郡是歲授公朝散大夫除冀州司馬又轉魏州司馬皆知州事于時天下雄韓而雄魏壯武而柔文公始厭承明初臨外郡探究望面犯禁崇姦欲嘗朱博之能以觀龔遂之政公深鈎潛往英機立斷短服赭裾於是乎理麟德初兼梓州長史蓋在華之南區彭之北鄙人豪俗侈政削公股攢六國之

遺昵雜三巴之輿壤公下車問俗觀風立政先之禮讓  
教以詩書抑浮窳禁蠹食至於堂叩鐘磬家擅山川莫  
不為之節制行其典禮來暮之頌復起於斯時高宗大  
帝方接千載之統昇中泰山玉帛雲趨朝者萬國公預  
陪金蹕侍拜瑤壇白雲既封皇慶斯洽加朝散大夫餘  
官如故東山拜命西駕未歸逢太歲之臨辰感殷楹之  
夢奠遇疾薨於官舍時年六十四嗚呼哀哉遺令薄葬  
不藏珠玉唯孝經一卷堯典一篇昭後嗣不忘聖道即

以某年月日葬於西嶽習仙鄉登仙里之西麓遵遺命也嗣子嘉賓等哀號泣血柴骨藥心緬惟罔極之恩思崇永錫之道以為吾丘子沒無助冥因季由也歎空勤負米於是攷羣聖之典探衆妙之門求所以昭報幽局贊社冥籍則云金位慈救寶手來迎若德崇於此則功濟於彼是用歸滅真諦祈祐能仁箱鐵圍而寫容現金蓮而得像遂於登仙麓塋之側造阿彌陀像一軀坐高三丈并象變菩薩天人畢備全金湧出衆寶莊嚴雲仙

鬼神周羅上界珠幡羽蓋圍繞香林所以丕顯尊靈光  
昭惠業達人之能事畢矣孝子之事親終矣銘曰巖巖  
大岳浼浼長河敲雲滃霧含靈佇和楊侯之國宛其中  
阿子孫瓜瓞軒蓋駢羅○四代三公自于伯起蟬聯彪  
懿令聞不已二十戶侯三十刺史世濟其榮至我君子  
○我我君子皎有令光不寵我組而括我囊洗心巖遁  
抗跡雲翔冥鴻不遠白駒在場○解其蘿袂綰我墨職  
邊翔多虞獫狁孔棘之子之往允威允德干旄在階烽



火罷色○行行駿馬繡衣之光烈烈董狐司史之良而  
我君子搃其徽章出同嚴助政穆王祥○雄魏既康鄴  
蜀猶侈攬轡言邁題輿載理尺兵允戢亂繩攸靡天子  
登封拜服玉趾○大禮既畢歸路遲遲歲亦秋止天不  
慙遺嗚呼眎吏號泣漣洏曷其往矣來暮歌思○甞甞  
孤子棘心哀疚永號昊天眇泣冥祐蓮花之國金池玉  
雷崇北香緣生彼穠秀○全金既湧衆寶斯莊攷墳其  
左俶瑩其旁香花圍繞松栢成行千秋萬歲祚祉無疆

梓州射洪縣武東山故居士陳君碑

君諱嗣字弘嗣其先陳國人也漢末淪喪八代祖祇自  
汝南仕蜀為尚書令其後蜀為晉所滅子孫避晉不仕  
居涪南武東山與唐胡白趙五姓置立新城郡部制二  
縣而四姓宗之世為郡長蕭齊之末有太平者兄弟三  
人為郡豪傑梁武帝受禪網羅英豪拜太平為新城郡  
守尋加本州別駕弟太樂太蒙蒙為黎州長史都督護  
南梁二郡太守樂為本郡司馬即君之高祖父也生曾

祖方慶好道不樂為仕得墨子五行祕書而隱於武東  
山生烈祖湯仕郡為主簿遇梁季喪亂避世不仕生皇  
考廣迴早卒君即迴之第二子也少孤而有純德恭  
己飾行一日三省家世本以清白崇德迨君之孤素業  
空矣君有仁兄養母以孝君順至行同勤苦節夏不避  
暑冬不避寒烝烝服事行年四十有五入則孝出則弟  
謹而信汎愛衆而親仁無餘力也以是不憂於道逮親  
終歿春秋已高從事不可以養矣乃輟干祿之學修養

生之道山壑高居農野永歲雅聞漢有王丹者隱居不仕家累千金以自奉田稼勤者載酒肴從鄉里承化以相懲沮乃歎曰彼王丹者是為政矣奚其為政也由是始攷林澤闢良田習山書務農政天道時變地道化成丘陵泉藪星歲雲物靡不用心也原田萑萑粳黍稷稷汶陽之稼如雲矣春日載華歲聿其秋白露時降百穀收熟君常乘乎肩輦省農夫饋田畷刑以肅情悅以勞勤若孫吳之用兵鷙鳥之搏擊也卓彼碩田歲取十千

倉庫寔崇禮節恤惸寡賑窮乏九族以親之鄉黨以歡之居十餘年家累千金矣其鄰國有媮衣食帶刀劍椎埋胠篋之類鬪雞走狗之豪莫不靡下風馴雅素曰里有仁焉吾何從也遂頤浮窳之節肅恭儉之行修孝弟飾廉恥將欲效君之素業也時年已耳順素無經世之情林園遺老玄默忘歲遂保先君武東山之故居行不由徑非公事未嘗至於州縣也昔襄陽有龐德公谷口有鄭子真東海王霸西山呂才皆避世之人養德退耕

以求志軒冕不可得而羈憂患不可得而累逮于我君  
作者五人矣於戲古者至人不利苟得而不務近貴量  
腹而食度身而衣非其道萬鍾不足豐也非其榮五鼎  
不足餌也躬勤耕植其杖而耘不答子路之問者豈我  
君之徒與綿綿羅網冥冥高鴻趯趯竹竿穆穆幽龍其  
與禍敗之遼絕胡越哉然則兩龔不免於蘭焚二老不  
免於薇歎其近貴利耶夫上無憂悔下無饑寒含道以  
制嗜慾達命以順生死仁以愛身智以養德俾爾耆而

艾俾爾昌而熾君子保之以永壽考非我君者乎享年  
八十有五太歲壬辰五月十三考終厥命臨終戒曰啓  
予足啓予手我聞古人有言珠玉而瘞之是暴骸于中  
原也古者不封不樹後世聖人易之以棺槨吾不敢違  
聖人可具棺槨而已歛以常服墳無丘壠吾將庶幾以  
奉先人之情也有子某等皆能祇奉遺訓聿從先志長  
壽二年龍集癸巳月日歲月載踰卜兆時吉始啓殯昭  
告奉遷於舊塋武東山之陽禮也鄉里會葬者千餘人

皆涕泣號慕悲純德之不見咸曰君子沒矣仁何以名  
陵谷不朽匪唯頌聲小子不敏謹述鄉人之教詞曰肅  
肅我祖國始於陳中裔淪喪洎此江濱山川隆鬱旂鼎  
氛氲生我君子於鑠元真性孝肅悌惟仁善鄰樂我耕  
稼忘我縉紳茫茫田藪歲也其春農人肅事君子犒勤  
孰為夫子植杖而耘弋者何慕鴻飛高雲楚狂懼世夷  
叔求仁良獨終矣不攷于身我異於是非隱非淪撫化  
隨運安排屈伸天年既沒長夜何辰聖達不免宇宙同



塵桐棺三寸豈我窶貧自古有禮吾從聖人嗟爾百代  
子子孫孫驕奢自咎天道無親思我松柏恭儉是遵

陳拾遺集卷五

欽定四庫全書薈要卷一萬三千六百十七

集部

陳拾遺集卷六

唐 陳子昂 撰

誌銘 銘

府君有周文林郎陳公墓誌銘

公諱元敬字某其先陳國人也五世祖太樂梁大同中  
為新城郡司馬生高祖方慶方慶好道德墨子五行祕  
書白虎七變法隱於郡武東山生曾祖湯湯為郡主簿

湯生祖通通早卒生皇考辯為郡豪傑公河目海口驚  
額虎頭性英雄而志尚玄默羣書祕學無所不覽年弱  
冠早為州閭所服耆老童幼見之若大賓二十二鄉貢  
明經擢第拜文林郎屬憂艱不仕潛道育德穆其清風  
邦人馴致如衆鳥之從鳳也時有決訟不取州郡之命  
而信公之言四方豪傑望風景附朝廷聞名或以君為  
西南大豪不知深慈恭懿敬讓以德也州將縣長時惑  
陳議青龍癸未唐歷云微公乃田棲絕穀放息人事餌

雲母以怡其神居十八年玄圖天象無所不達嘗宴然  
坐謂其嗣子子昂曰吾幽觀大運賢聖生有萌芽時發  
乃茂不可智力圖也氣同萬里而遇合不同造膝而悖  
古之合者百無一焉嗚呼昔堯與舜合舜與禹合天下  
得之四百餘年湯與伊尹合天下歸之五百年文王與  
太公合天下順之四百年幽厲版蕩天紀亂也賢聖不  
相逢老聃仲尼淪溺溷世不能自昌故有國者享年不  
永彌四百年餘戰國如麋至於赤龍之興四百年天紀

復亂夷胡奔突賢聖淪亡至於今四百年矣天意其將  
周復乎於戲老矣汝其志之太歲己亥年七十有四七  
月七日己未隱化於私館孤子子昂愚昧鞠然在疚不  
知所從乃祇馴聖人卜宅之義是歲十月己酉遂開拭  
舊塋奉寧神於此山石佛谷之中崗也銘曰

賢者避地邈其往兮鳳兮鳳兮誰能象兮嗚呼我君懷  
寶不試孰知其深廣兮悠悠白雲自怡養兮大運不齊  
賢聖罔象兮南山四君不遭漢天子固亦商丘之遺壤

分

申州司馬王府君墓誌

君諱某字某先太原人也昔周文王有聖人之德甲子  
受圖至我靈王誕膺丕顯太子晉得鳳凰之瑞恭揖羣  
后上為帝賓綿綿生人作我王氏迨秦有賁翦并吞諸  
侯晉有渾祥功格帝室魏至慧龍為貴種矣十二代祖  
卓晉常山公主子也始公主湯沐邑在汾陰永嘉淪夷  
不及南度因樹粉檟而結廬焉卒塋於長壽原至今鄉

有太原之號也曾祖亮周開府儀同上大將軍隋信州  
刺史鐔姐之師也祖儉隋離石郡守唐石州刺史贈岳  
州總管廣武烈侯社稷之器也父諶唐虞部郎中荊州  
大督府司馬商璧廊許冀五州刺史加銀青光祿大夫  
瀘州都督金水敏侯上柱國廊廟之才也敏侯有功於  
國始賜土田白茅苴之在鄴之曲因食采今為雍州人  
君即敏侯之元子炳靈珍粹輝采幽黃愿而以恭寬而  
以栗青衿聞道已光大矣天子立太學所以養賢公子

齒上庠所以觀國君休烈淵塞志業雲翔年若干為國  
子生其中射策甲科解褐補吳府參軍事昔吳王帝之  
愛子國選英寮君三德允章六行既穆與某郡劉孝孫  
首先此舉誦詩三百和淑其仁而醴酒不恭楚筵亦廢  
坐除滑州錄事參軍又轉隴州錄事參軍時樂城公劉  
仁軌以宰相之貴持節此州暖然推中主諾責下君提  
綱未幾羣輅載孚公坐嘯以為能也舉遷汾州平遙縣  
令其地有臺駘之恠蟋蟀之人君黃鼎分中鳴琴不下



鐘鼓既考風俗允和帝曰良哉而格我政加朝散大夫  
遷岐州扶風縣令昔尹翁歸以文武之幹緝熙此邦黃  
圖雖寧赤丸未弋君以庚斷甲距設匭投鈎赭裾始繩  
聖面咸革丁我敏侯艱遂茹哀苦廬銜恤終紀是歲申  
國不理元寮佇才制加朝請大夫授申州司馬屬太夫  
人有羸老之疾去官不之白華增勤綵衣是慕至於朝  
盥夕膳候色承歡夔夔齊栗蒸蒸不匱有若楚老萊子  
之為嬰兒也嗚呼昊天不弔降我鞠凶太夫人以眉壽

薨時君年已七十二矣禮以飲酒而君絕漿虞以降哀  
而君泣血斃斃在疚藥棘其心新穀未升匪莪以殞以  
某年青龍癸巳薨於某里第之正寢孝之終也嗚呼哀  
哉昔聖人五十而慕先子謂之正德今君七十二而盡  
其哀非敦篤允元深仁淑德者疇能若此哉夫人弘農  
楊氏隋內史侍郎舟川公演之孫女也幼有淑德而美  
令儀采蘋昭華穠荷比秀至於內嚴閭訓外匡君子麟趾  
以穆雞鳴有章誠道暎公宮事宣彤管晚年以儒因未

究其業惟採遂揭無生之筌將遺有漏之屣顓潔道行  
受蓮花經理極翻三心滅不二形妄緣盡歸真化冥歲  
在丁酉處順而往始我府君以懸車之歲從負米之勤  
夫人亦能肅恭晨昏嚴祗左右夫至行莫大於孝崇義  
莫顯乎忠君克勤於家盡力於國刑于妻子至於朝廷  
夫闕而與物或有違闕而無適闕義所以此君好謙達  
禮研幾成務摹其法器無不馴從其事政無不理夫用  
我者而豈徒哉嗟乎矜而能廉利而不浼百行允備三

事不階臧文仲其竊位與柳下惠其直道與有子四人  
長曰某官至武連縣令先公而卒次子某等皆肅奉嚴  
訓景行高山達於家邦光於禮樂永號罔極泣血昊天  
始府君臨終遺令薄塋墨龜未食青鳥不封權殯於某  
所需吉兆也龍集己亥律躔應鐘金雞鳴玉狗吠黃腸  
密啟丹旒徐飛始遷神於某原之陽禮也青龍在左朱  
鳳居右雙衾共封二室同穴珠玉不瘞丘隴誰傳刻此  
金石以旌後賢

唐水衡監丞李府君墓誌銘

君諱某字某趙國人也乃昔嬴楚睽孤豪傑雲起廣武  
君負霸王之略為成安之師實欲北興帝基南面稱創  
雄圖未展大運陵頽傳云有明德當代不顯其後必有  
昌者自武至君二十四代矣公侯寶玉刻鼎銘鐘紛綸  
歲穠世濟不泯六代祖孝伯後魏部尚書秦州都督宣  
城公魏之名臣載在青史曾祖某後周陝州芮城縣令  
祖某屬隋運版蕩君子道消遜言遁時不顯於仕拜儒

林郎父某唐隆州蒼溪縣丞襄州荆山縣尉有高才而  
無貴仕君鍾常山之氣炳漳水之靈少尚名節躬行仁  
義始入太學以精理見知未幾進士高第拜白水縣尉  
尋轉雲陽尉屈青雲之資從黃綬之任雖吏道迫屑而  
遐情眇然秩滿調補洛陽尉盤根利器尹守拭目遷懷  
州司法祿不徇榮位以行道雅尚貞遜與衆趨少合洎  
上聞對策甲科授益州大都督府錄事參軍滿歲擢授  
水衡監丞君所居清澹仁惠為政識真之士以公輔許

之而好學篤道介如石焉故位不充量縉紳高其才烈  
士伏其義竟不能驤首雲路長鳴天衢知與不知咸皆  
共嘆有餘恨也而君浩然冥順獨與化遊方將幽採玄  
微精覈通變天命不祐春秋若干遘疾終於官某歲某  
月安厝於某所禮也嗚呼古所謂歿而不朽者有矣夫  
遺言餘旨粲然可觀有子曰某痛門風之將泯懼世業  
之罔傳乃刊石紀德銘旌之曰

常山之靈和氏之英世有明德鍾此令名黃黻不貴拱

壁為輕仕以弘道祿匪徇榮高志厲雲思機入冥嗚呼  
天乎殲我國禎

唐故循州司馬申國公高君墓誌

君諱某字某渤海蓆人也昔周天子命我太公受封東  
海鐘鼎寶玉七百餘年故其公侯世有國祀曾祖勵字  
敬德北齊朔州太行臺僕射襲爵清河王改封樂安王  
周授開府隋授揚楚洮三州刺史我唐有命崇寵典章  
貞觀初贈恒定并趙四州刺史垂拱中又贈特進非明



德上公孰享之哉

祖宗儉字士廉皇朝太子太傅上柱國申國公食邑三千戶贈司徒并州刺史永徽初贈太尉配享太宗文皇帝朝廷謚曰文獻昔帝光天下公實佐之至是元勛克配清廟父懿字履行秦府軍直千牛滑州刺史將作大匠金紫光祿大夫太常卿洪州都督上柱國申國公尚東陽長公主駙馬都尉衣冠禮樂盡在是矣故帝乙歸妹尚於中行公則駙馬之元子也含章丹穴藉寵黃

扉承禮訓於公庭盡儀刑於士則年若干嗣封申國公  
十四解巾授千牛備身趨奉紫璋已有光矣秩滿補海  
監府左果毅都尉再遷游擊將軍右帥府郎將遂昇榮  
禁衛承寵司階千廬之務式遵八舍之榮攸襲又授朝  
散大夫尚輦奉御再遷尚衣奉御屬宸宮構難巫蠱禍  
興坐堂弟岐左遷循州司馬蒼梧南極桂海東浮是  
惟篁竹之區而有山夷之患永隆二年有盜攻南海  
廣州邊鄙被其灾皇帝哀洛越之人懼其凶害以公名

家之子才足理戎廼命專征且令招慰

一作討

公奉天子

威令以喻越人越人來蘇日有千計公乃惟南蠻不討之日久矣國有大命將布遠方欲巡禦象林觀兵海裔彼蒼不弔天我良圖因追寇至廣州遇疾薨於南海之旅次時年若干嗚呼哀哉珠鼎之秀邦國之光負才能重書劒方將克崇舊業祇寵前人降年不長永墜厥緒嗚呼哀哉夫人京兆韋氏銀青光祿大夫太子詹事武陽侯琨之第某女也有淑慎之德窈窕之賢長於公宮

少習婦道年十六歸於申國鳳臺尊閔鵲巢斯在雖珠

玉翡翠職是其儀而澣濯蘋蘩不改其操故我君子琴

瑟友之年三十儀鳳二年先公而歿其年權殯先塋嗚

呼哀哉始公之適南裔也夫人逝矣死生言別永懷燕

越之悲旌旒同歸終淪松栢之路先是公有命合塋弘

道歲靈輓自南海還嗣子紹等追惟永終仰遵先志粵

載初元年歲在攝提格始昭啟亡靈改卜遷祔某月日

遂合塋於少陵原禮也嗚呼哀哉霸山南望秦川滿目

紫臺鐘鼓方對於青春白楊丘陵獨悲於玄夜紹等以東西之人懼岡陵之變古不樹今則墳焉

率府錄事孫君墓誌銘

嗚呼君諱虔禮字過庭有唐之人也幼尚孝悌不及學文長而聞道不及從事祿值凶孽之灾四十見君遭讒匿之議忠信實顯而代不能明仁義實勤而物莫之貴墮厄貧病契濶良時養心恬然不染物累猶攷性命之理庶幾天人之際將期老有述死且不朽寵榮之事於

我何有哉志竟不遂遇暴疾卒於洛陽植業里之客舍  
時年若干嗚呼天道豈欺也哉而已知卒不與其遂能  
無慟乎銘曰

嗟嗟孫生見爾迹不知爾靈天竟不遂予願分今用無  
成嗚呼蒼天吾欲訴夫幽明

故宣議郎騎都尉行曹州離狐縣丞高府君墓誌  
銘

君諱某字某先渤海脩人也因仕居洛今為陽翟人昔

楮鞭乘運襲炎帝之宗蒼光應期承太公之肩崇勛霸  
業光烈猶存曾祖某北齊太子中舍人贈冀州刺史青  
宮近侍光寵朝班皂蓋追榮恩崇國禮祖欽仁隋左親  
衛大都督檢校祕書郎帶七尺劒始遊天子之階持三  
寸筆終入芸香之閣父柚唐江州潯陽縣令舒州懷寧  
縣令絃歌之化身不下堂神明之威虫蝗避境君即懷  
寧府君之長子黃河一直青松萬仞性惟仁孝行實溫  
恭文義必以潤身名節由其狗物唐龍朔元年有制舉

忠鯁君對策及第試守永州湘源縣尉位卑黃綬志在  
清規秩滿以常調補鳳州黃花縣丞梁竦長懷尚勞州  
縣桓譚不樂空負琴書又轉易州遂城縣丞以管輅之  
材趙典之任古人斯在君子居之大周革命任曹州離  
狐縣丞春秋已高日月方出武盡美矣不得夷齊之臣  
文哉郁乎自邈夏商之道於是因階秩滿告老歸閑閉  
郊扉於南野習巖居於東澗詩書琴酒以觀先達之風  
山水丘園將為遺老之賞天授二年歲在單閼七月二



十日考終厥命卒於陸渾縣明高之山莊時年七十有二嗚呼哀哉君雅尚節義素履元亨懷古人之遠圖慕先賢之遺烈以為桓魋石槨非則於禮經墨翟桐棺實宜於聖典遺令薄塋務取隨時即以其年十月塋於北邙山平樂之原禮也嗣子思恭孝思罔極喪制過哀思封樹而緬懷恐東西而不志白楸為槨奚遵古塋之儀丹漆題封即表永年之記銘曰

泱泱大風其太公兮穆穆君子紹厥宗兮忠鯁察廉仕

漢宮兮高才位卑命考終兮哀哀孤子號蒼穹兮歸塋  
平陵松栢桐兮

唐故袁州叅軍李府君妻清河張氏墓誌銘

夫人清河郡東武人也昔軒轅錫胤弧矢宗威畏其神  
者三百年得其姓者十四族金貂七葉漢天子之忠臣  
鼎足三公晉武皇之名相孤卿玉帛世有其庸曾祖某  
北齊太常卿徐兗二州刺史天人之禮位掌於秩宗侯  
伯之尊寵優於露冕祖某隋汾陰壽春陽城三縣令龍衣

公侯之瑞屈銅墨之班士元非百里之才太丘有三台之望父  
唐戶部侍郎復堯建三州刺史尚書北斗始贊於南宮方岳專  
城終榮於獨坐夫人即刺史之弟若干女也稟柔成性蘊粹  
含章承禮訓於公庭習威儀於壺則夫其窈窕之秀婉孌之  
姿貞節峻於寒松韶儀麗於溫玉鉛華不御飾環珮之容澣  
濯是衣勤黼黻之綵自作嬪於君子主中饋於家人三千之禮  
不違九十之儀無慝至乃恭於奉上順於接下仁孝以承宗祀  
慈惠以睦閨門則雍雍踴踴必由其道矣嗚呼府君不造邁此

閔凶中年不圖蚤世而殞青松摧折哀斷女蘿之心丹  
桂孤高終守栢舟之誓而府君食先人之德無後生之  
財夫人徇黔婁之貞闕丹臺之產孀居永日蓬首終年  
處貧素而彌堅保幽芳而不昧始府君之逝有四子焉  
少遭罔極之哀未奉過庭之訓夫人保持名教終始禮  
經既勗之以義方又申之以遠大皆能率由慈訓克荷  
嘉聲箕裘之業載隆燕翼之謀不殞非夫淑明賢懿聖  
善溫良崇婦道之深規弘母儀之至範孰能昭宣令聞

若斯之盛哉彼蒼不忱殲我眉壽春秋若干載初元年  
月日遘疾終於洛州某里之私第嗚呼哀哉夫人令儀  
有穆惠聞無喧敦雅志於詩書婉綢情於琴瑟若乃姆  
師酒食之儀女工纂組之繁莫不總制清理弘宣懿則  
茂蘋蘩之雅訓協沼沚之芳猷古稱敬姜詩云淑女論  
容比德殆無以過禮華不居松扃永閔嗣子某等悲摧  
纓棘思結寒泉永惟同穴之儀仰遵歸祔之典以大周  
天授二年二月日朔遷祔於袁州君之舊塋禮也合塋

非古奉周公之儀墓而為墳宗仲尼之訓嗚呼鴛鴦之  
樹眇泣於松楸鼓吹之列緬然於丘壠原陵何代銘誌  
無文有哀黃鳥之詩遂勒青鳥之兆銘曰

詩云淑女君子好逑懿哉令德嘉儀聿修溫容玉映峻  
節松秋妙心彤史潔志玄猷昭宣壺則惠穆蘋洲共伯  
早逝貞姜獨留筑居蓬首哀深栢舟彼蒼不憖此夜長  
幽懷南風之吹棘想北隴以同丘青春兮白日獨昭昭  
以悠悠

上殤高氏墓誌銘

維唐垂拱二年太歲景戌七月二十日殤子高氏卒嗚呼哀哉瓊敷而不玉實者有矣夫吾觀顓元機化出入夭壽之數榮落之原皆一受而不易者也悲夫古人之仁懿中庸不幸短命今復見之於高子子渤海蓇人也黃州府君之幼孫宛丘府君之叔子生而岐嶷實覃實華越在襁褓神明滋茂童蒙淵敏光潤玉顏八歲始教方書受甲子已知孝悌之道詩禮之規宛丘府君鍾愛

之他日嘗趨庭與諸兒戲神情涵泳綽然如鴻雛鵠子  
有青雲之意也府君美之曰能光我家者此兒十五通  
左氏春秋及尚書淵騫之志日新宏大矣不幸享年十  
七遇疾而夭嗚呼哀哉宛丘府君感慟哀過於禮不恨  
爾壽之不長惜爾器之不彰夫何昔育今也則亡嗚呼  
吾將老矣遠爾何哉某年七月殯於家園日月云徂六  
載於茲矣天鳳二年龍集辛卯府君方大崇元域以安  
先兆諸子之柩皆祔焉其年一月癸卯朔十八日庚申



啟殯歸瘞之塋禮也銘曰

來不可遏去不可止唯

闕

與生由生以死於戲殤子噫

何往矣傷慈父之肝情獨冥冥而長已死而有知可也  
若其無知悲爾

堂弟孜墓誌銘

君諱孜字無怠其先陳國人也六代祖太樂梁大同中  
為本郡大司馬生五代祖方慶屬梁亂始居新城郡武  
東山高祖湯為郡主簿生曾祖通蚤卒通生皇祖辯少

習儒學然以豪英剛烈著聞是以名節為州國所服皇  
祖生考元爽保植先人茂德降生於君幼孤天資雄植  
英秀獨邁性嚴簡而尚倜儻之奇愛廉貞而不拘分獨  
之操始通詩禮略觀史傳即懷軌物之標希曠代之業  
故言不宿諾行不苟從率身克己服道崇德閨門穆穆  
如也鄉黨恂恂如也至乃雄以濟義勇以存仁貞以立  
事毅以守節獨斷於心每若由己實為時輩所高而莫  
敢與倫也是以鄉里長幼望風而靡邦國賢豪聞名而

悅服方謂拂羽喬木緬昇高雲而遭大過棟撓而殞鳴  
呼天降弔乎時年三十五是歲龍集癸巳有周天授二  
年七月卜兆不吉權殯於真諦寺之北園始以今甲午  
歲獻春二月己酉朔二十五日癸酉定於石溪山之北  
岡陪秀墳也君家世墳壠在武東山昭穆崇封松栢列  
盛至君考遺令獨愛石溪之岡故君從先志祔塋於此  
嗚呼哀哉始君伯父海內之文人也含純剛之德高代  
之行每見君嘆曰吾家世雖儒術傳嗣然豪英雄秀濟

濟不泯常懼後來光烈不象先風每一見爾慰吾家道  
實謂君有逸羣之骨拔俗之標超山越壑可以駿邁也  
豈其天絕喪茲良圖嗚呼其元命歟遭命歟天不忱歟  
道固謬歟大圓蒼蒼大方茫茫賢聖同此爾之何傷古  
人有言珠玉而瘞是暴骸於中原况吾家道尚儉名訓  
未墜封樹之禮吾敢過焉是用錫爾瓦木之器塗芻之  
靈堯舜之典忠孝之經昭示後代以安爾形銘曰  
我祖之歲蕤兮邈於陳緬遙裔兮此江濱五代崇光兮

至夫君徽烈英曜兮始氛氲何意嚴霜兮降青春玉樹  
摧落兮成黃塵南山無隙兮永幽淪悠悠昭代兮卜爾  
辰吾慟感傷兮號蒼旻問之著策兮立茲墳乃言千載  
兮衣冠來臻黃頭兮勿傷神

館陶郭公姬薛氏墓誌銘

姬人姓薛氏本東明國王金氏之胤也昔金王有愛子  
列食於薛因姓焉世與金氏為姻其高曾皆金玉貴臣  
大人也父永冲有唐高宗時與金仁問歸國帝疇厥庸

拜左武將軍姬人幼有玉色發於穠華若彩雲朝升微  
月宵映也故家人美之少號僊子聞羸臺有孔雀鳳凰  
之事瑤情悅之年十五大將軍薨遂剪髮出家學金僊  
之道而見寶手菩薩靜心六年清蓮不至乃謠曰化  
雲心兮思淑真洞寂滅兮不見人瑤草芳兮思蓋蓋  
將柰何兮分青春遂返初服而歸我公郭公豪蕩而好  
奇者也雜珮以迎之寶瑟以友之其相得如青鳥翡翠  
之婉孌矣華繁艷歌樂極悲來以長壽二年太歲癸巳

二月十七日遇暴疾而卒於通泉縣之官舍嗚呼哀哉  
郭公恍然猶若未亡也寶珠以含之錦衾而舉之故國  
途遙言歸未迨畱殯於縣之惠普寺之南園不忘真也  
銘曰

高丘之白雲兮願一見之何期哀淑人之永逝感紺園  
之春時願作青鳥長比翼魂魄歸來遊故國

唐陳州宛丘縣令高府君夫人河南宇文氏墓誌

銘

夫人諱某河南郡人也昔吾君夏后氏之子霸有幽郡  
皇運北興鼎國南起開寶符而帝天下撫璿璣而王中  
國則後周之受命武帝之雲孫夫人四代祖也曾祖某  
失周之子封亡山陽之國雖存天子之肩已類咸陽布  
衣植德蚤天祖某隋朝官澧州澧陽令父某龍州司法  
皆承家席寵世有令名夫人貢穠華襲繁祉崇徽惠穆  
秀色茗榮自於幼年有令儀也十四適於高府君夫其  
溫慈惠和信肅修穆行有法度動有禮經嚴格以理家



人嫻瑟以和君子則已含乎光大矣若乃宗廟哀敬仁孝也娣姒祇和謙順也蠲潔酒食婦儀也黼黻玄黃女工也弘此四德而務六親輦輓以文之雜珮以發之猗可以作範母儀昭宣壺則矣至於訓子以睦教女以順愛下以慈與人以讓外以贊府君之德內以光中饋之教皆曰聞其進不見其退也嗚呼仁而不壽生也永中永淳元年五月遇疾終於宛丘縣之官舍年二十七嗚呼哀哉高府君尋以事罷職山瑩未卜旌旒來歸府君

思北海之魂留東園而殯日月遂往九歲於茲府君方  
崇樹先塋增封舊域以周天授二年太歲辛卯二月癸  
卯啟殯於東園祔於洛州某原禮也哀哉夫人雅有高  
行終而不忘以為厚塋非禮也是以珠玉不飾塋瓦是  
藏高府君聿遵其志率以薄塋於戲非古之明德淑女  
金玉其光何以躋之吾忝門閭之賓其家道之雍穆懿  
鑠實有清風故叙之而未充德也銘曰

天天桃李有華兮灼灼淑人宜家兮修睦婦道不諱兮

窈窕嬪儀孔嘉兮榮采之方茂而云亡兮咨嗟

周故內供奉學士懷州河內縣尉陳君碩人墓誌

銘

君諱該字彥表綿州顯武人也其先自潁川遷蜀矣曾祖寄祖曾考永貴皆養高不仕君少好學能屬文上元元年州貢進士對策高第釋褐授將仕郎其明年制勅天下文儒司屬少卿楊守訥薦君應詞彈文律對策高第勅授茂州石泉縣主簿開耀元年制舉太子舍人司

議郎太府少卿元知讓應制薦君於朝堂對策高第勅  
授隆州蒼溪縣主簿垂拱四年又應制學綜古今對策  
高第勅授懷州河內縣尉凡歷所職皆以清廉仁愛著  
聞有周革命天授三年恩勅自河內追入闕供奉居未  
朞不幸遇疾於神都積善坊考終厥命年六十三歸塋  
於豆四山之陽原禮也嗚呼哀哉古人有云飾顏夷之  
行不逢青雲之士而聲名磨滅者有之矣嗚呼陳君敦  
懿玄默潔清溫良馴道執志好學博古徇徇焉行高職

卑不改其操學優祿薄不怨於天四舉有道三歷下位晏  
如也非淳人淑士其誰能湮而不渝哉夫知命可謂君  
子矣好學可謂為文矣丹書不藏於勛府青史不昭於  
方冊於戲一絕故老之口孰知夫子之賢哉某與君族  
人也服美其德尚矣昔子雲稱李元常璩叙令伯皆沒  
而不朽後代稱之斯非若人之徒歟吾豈默而無述其  
銘曰

閭閻君子好斯文兮緝藻輦章潛卿雲兮棲遲下位允

升聞兮金署玉堂見吾君兮鸞階鴻漸期紫氛兮鐘鳴  
漏盡竟蘭焚兮儒行墨節將何云兮恭承遺言立石文  
兮金刻丹書紀歲辰兮青龍甲午銘茲墳兮

燕然軍人畫像銘

并序

龍集丙戌有唐制匈奴五十六載蓋署其君長以郡縣  
蓄人荒服賴寧古所莫記是歲也金徽州都督僕固始  
桀驚惑亂其人天子命左豹韜衛將軍劉敬同發河西  
騎士自居延海入以討之特勅左補闕喬知之攝侍御

史護其軍夏五月師舍於同城方絕大漠以臨渤海君  
子曰兵者凶器仁何至之醜虜猖狂厥自招咎今至尊  
不得已而順伐嘗聞西方之聖有能仁者凶吉之業各  
報以直則使元惡授首羣亡不孤立無血刃荒服底定  
豈不在於大雄乎諸將部校僉曰允哉將軍乃飭躬率  
士卒自古祠廟圖畫形容有古之彌勒像也天人備容  
丹青畢彩蓋以昭乎景福也乃作銘曰

耀天兵兮征荒服絕雲漢兮出玄極白羽飾兮青雲旗

簫鼓鳴兮士馬悲願左右兮浮屠道備丹青兮妙天寶  
功既畢兮業既成神不來兮福冥冥

冥冥窅冥君古墳記銘為張昌寧作

神功元年龍集丁酉我有周金革道息寶鼎功成朝廷  
大寧天下無事皇帝受紫陽之道延訪玉京羣臣從白  
雲之遊載馳瑤水笙歌入至玄鵠飛來時余以銀青光  
祿大夫忝在中侍擁青旄之節陪翠鸞之旗昔奉車子  
侯獨隨武帝昌明為御史每侍軒遊比之今日未足多



幸是時屢從嚴祀遙謁祕封嘗覩衆靈如雲羣僊蔽日  
乃仰感王子晉俯接浮丘公行吹洞簫坐弄雲鳳竊欲  
邀羽袂導鸞輿求不死於金庭保長生於玉冊上以尊  
聖壽下以息微躬因登緱山望少室尋古靈跡擬刻真  
容得王子晉之遺墟在永水之層曲且欲開石室營壽  
宮庀徒方興畚鍤攸作乃得古藏焉其藏上無封壝內  
有甃瓦南北長二丈二尺東西濶八尺中有古劒一長  
尺餘銅椀一并瓦器二其器文彩恠異非蟲篆雕斲所

能擬也又有古五銖錢朱漆片數十枚初開時文彩可見及振撥之應手灰滅既無年代銘誌不知爵里官族參驗其事已曾為人所開於是撫之永懷念昔增密始知有形必敝涉器則毀鐘鼎玉帛非度世之資名位寵章為累真之府未能獨立物表超世長存與日月齊光天地比壽非夫道乎冥冥窅冥君久幽珍藏迨此昭發豈不欲感示玄契竒暢靈期昔王喬古墳唯畱一劍令威荒塚又嘆千年起予道心在乎此仰惟聖主仁慈恩

被草木陽和掩骼既昭國典至德埋胔又在周令今此  
藏虧露誠感仁惻謹厯吉日協良辰即以其年十月甲  
子朔其物備容還定舊壙豚雞在奠犧罇若歆哀其銘  
誌磨滅姓位不顯乃錫之名曰冥冥君其銘曰

闕

陳拾遺集卷六

謹案卷四第二頁後六行青瑣任隆原本瑣訛鎖  
今改

第十二頁後四行刻印在手原本刻訛刑今改

卷五第十四頁前二行時日月會于龍狔原本狔  
訛狔據國語改

第十五頁前二行皆以政洽仁顯功著頌宣揚金  
帛嘉止不日而至原本疑有脫誤

第十七頁前三行迨震秉彪賜四代三公原本三

訛五據後漢書楊震傳改

卷六第七頁前二行炳漳水之靈原本漳訛障今

改

第八頁前一行祿匪徇榮原本徇訛伯今改

第十五頁前五行峻節松秋原本秋訛楸今改





總校官庶吉士

臣

侍

朝

校對官檢討

臣

王鍾健

謄錄監生

臣

王永榮

謄錄監生

臣

王心仁

王已來未嘗覩也臣聞仲尼曰聖人吾不得而見之矣  
又曰舜禹之有天下而不預也又曰鳳鳥不至河不出  
圖吾已矣夫皆傷不得見大道之行而鬱悒也臣草鄙  
愚陋生長休明親逢聖人又覩昌運舜禹之政河洛之  
圖悉皆目見幸亦多矣今者鳳鳥來赤雀至慶雲見休  
氣昇大周受命之珍符也不稽元命採祕文採風謠揮  
象物紀天人之會以協頌聲則臣下之過也有國彛典  
其可闕乎臣不揣朴固輒獻神鳳頌四章以言大周受

欽定四庫全書薈要

集部

陳拾遺集卷八

詳校官助教臣常循





欽定四庫全書薈要卷一萬三千六百十八

集部

陳拾遺集卷七

唐 陳子昂 撰

頌文引歌狀詞序

上大周受命頌表

天授九年



臣子昂言臣聞昔周道昌而頌聲作遂能昭配天地光  
烈祖宗垂之無窮永為代典伏惟神聖皇帝陛下闡玄  
極昇紫圖光有唐基以啟周室不改舊物天下惟新皇

王已來未嘗覩也臣聞仲尼曰聖人吾不得而見之矣  
又曰舜禹之有天下而不預也又曰鳳鳥不至河不出  
圖吾已矣夫皆傷不得見大道之行而鬱悒也臣草鄙  
愚陋生長休明親逢聖人又覩昌運舜禹之政河洛之  
圖悉皆目見幸亦多矣今者鳳鳥來赤雀至慶雲見休  
氣昇大周受命之珍符也不稽元命採祕文採風謠揮  
象物紀天人之會以協頌聲則臣下之過也有國彞典  
其可闕乎臣不揣朴固輒獻神鳳頌四章以言大周受

命之事誠未足以潤色鴻業揄揚盛美亦小臣區區丹  
慊之至謹輒詣洛城南門奉進塵冒旒冕伏表慚惶

大周受命頌

四章并序

臣聞大人升階神物紹至必有非人力所能存者上招  
飛鳥下動泉魚古之元皇祇承上帝所以協人祉匹天  
休卓哉神明昭格上下莫不以之矣是故物有可則而  
道有可宗謂之文獻其原上也緬哉有唐欽崇天命三  
祖繼統品物咸章玄厯改元黃瑞告神皇出地軸陟天

階厯軒轅登太昊集乎初始之極以授我皇符鳥之肇  
開闢元台女希氏姓神功大哉莫不盛於茲日矣乃察  
璿璣稽寶命發玄讖升紫圖則天粲然皇文炳也非夫  
昇光之曜魄寶之精其孰能威神皇赫赫若斯者哉是  
時三階底平百揆時序天下昌矣玄功溥矣西土耆老  
欣然來稱曰至哉天子恤我元元勤勞下都升聞上帝  
臣聞天無二日土無二主皇帝嗣武以主七鬯豈不宜  
乎神皇首然迺登崑崙之臺修三統觀五始探命厯之

紀則知元氣之所造也方採鍾龍象鳴鳳協林黃之律  
以因生賜姓九月戊申朔六日己卯朔神都耆老遐荒  
夷貊縑衣黃冠等萬有二千餘人雲趨詣闕請曰臣等  
聞王者受命必有錫氏軒轅皇帝二十五子班為十二  
姓高陽氏才子二八命為十六族書云祇台德先不距  
朕行然則聖人起則命厯昌必有錫氏之規臣等伏惟  
陛下受天之符為人聖母皇帝仁孝肅恭神明可以纂  
武承家以克永代陛下崇錫類垂憲章不易日月天人

交際斯亦萬代之一時臣等固陋不達大道敢昧死上  
聞神皇穆然方御珍圖謙而未許也越翌日庚辰文武  
百寮又與耆老夷貊道俗等五萬餘人守闕固請曰蓋  
臣聞聖人則天以王順人以昌今天命陛下以主人以  
陛下為母天之丕律元命也人之大猷定姓也陛下不  
應天不順人獨高謙讓之道無所憲法臣等何所仰則  
敬冒昧萬死固請是時目踵昆吾有鳳鳥從南方來歷  
端門羣鳥數千蔽之又有赤雀數百從東方來羣飛映

雲迴翔紫闥或止庭樹有黃雀從之者又有慶雲休光  
半天傾都畢見羣臣咸覩於是衆眊雲萃囂聲雷動慶  
天應之如響驚象物其猶神咸曰大哉非至德孰能覩  
此昔唐虞之瑞逖聽矣今則見也天物來聖人革時哉  
况鳳者陽鳥赤雀火精黃雀從之者土也土則火之子  
子隨母所以纂母姓天意如彼人誠如此陛下曷可辭  
之昔金琴鳳凰鎬京黃鳥赤氏朱鴈有吳丹鳥皆紀之  
金冊藏之瑞府以有事也陛下若遂辭之是推天而絕

人將何以訓於是皇霈然曰俞哉此亦天授也乃命有司正皇典恢帝綱建大周之統厯革舊唐之遺號在宥天下咸與維新賜皇帝姓曰武氏命為嗣皇崇乎紹天統物其赫胥大庭之上事已乃獻頌曰

天命神鳳降祚我周彩容有穆其儀孔休惟我有周實保天德上帝臨命纂承唐極人曰天祐有皇女希造天立極緬然猷徽赫我皇帝乃先厥微匪天之命鳳鳥誰歸因生錫氏革號循機豈不順乎天而應乎人帝曰俞



哉

右神鳳章

翺翺赤鳥朱火之光含神之務祕帝之祥在昔甲子降  
祚於昌今則庚辰翩翩來翔來翔維何作我聖皇提提  
黃鳥載飛載揚從火之母應土之王體仁資孝類我嗣  
皇恭膺錫氏稽首龍章天授萬年聖帝煌煌

右赤雀章

崑崙元氣實生慶雲大人作矣五色氤氲昔在帝媯南

風既薰藂芳爛湯郁郁紛紛曠矣千祀慶雲來止玉葉  
金柯祚我天子非我天子慶雲誰昌非我聖母慶雲誰  
光慶雲應矣周道昌矣九萬八千天授皇年

右慶雲章

周道赫兮天寶開八方協公兮萬國來天人應兮雷雨  
作聲教殷兮宇宙回璿圖寶兮稱萬歲神皇穆兮崑  
崙臺

右毗頌章

國殤文一首 并序

丁酉歲三月庚辰前將軍尚書王孝傑敗王師於榆關  
峽口吾哀之故有此作

天未悔禍兮熾此山戎虐老昏幼兮人罹其窮帝用震  
怒兮言剪其凶出金虎兮曜天鋒掃宇宙之甲馳燕薊  
之衝何士馬之沸渭若雲海之洶洶荆吳少年韓魏勁  
卒戈矛如林白羽若月且欲蹈烏丸之壘刈赤山之旗  
聯青丘之徽封黃龍之屍凶胡猖獗姦險是憑蛇伏泥

滓蟻鬪丘陵哀我將之忤勇兮無算略以是膺陷天井

之死地屬雲騎以相騰短兵既接長戟亦合星流颺馳

樹離

一作雜

山沓智無所施其巧勇不能制其怯頓金鼓

之雄威淪輿尸之敗業天乎哀哉鳴石既書白日頽主

將已死士卒哀徒手奮呼誰救哉含憤沈怒志未迴殺

氣凝兮蒼雲暮虎豹慄兮殤魂懼殤魂懼兮可奈何恨

非其死兮棄山河血流骨積殪荒楚思歸道遠不得語

降不戮兮北不誅歿不賞兮功不圖豈力士之未徇誠

師律之見孤重曰壯士雖死精魂用凶醜爾讎不可縱  
我聞僵死能厲灾古有結草抗杜回苟前失之未遠儻  
冥讎之在哉嗚呼魂兮念歸來

禡牙文

萬歲通天二年三月朔日清邊道大總管建安郡王某  
敢以牲牢告軍牙之神蓋先王作兵以討有罪奸慝竊  
命戎夷不恭則必肆諸市朝大戮原野我皇周子育萬  
國寵綏百蠻青雲干呂白環入貢久有年矣契丹凶羯

敢亂天常乃蜂屯丸山豕食寮野宴安鳩毒作為撓搶  
天厭其凶國用致討皇帝命我肅將王誅今大軍已集  
吉辰協應旄頭首建羽旆前列夷貊咸威將士聽誓方  
俟天休命為人殄災惟爾有神尚殲乃醜召太一會雷公  
翼白虎乘青龍星流彗掃永清朔裔使兵不血刃戎夏大  
同以召我天子之德允乃盱本有神字神之功豈非正直克  
明哉無縱世讐以作神羞急急如律令

祭海文

萬歲通天二年月日清邊道軍海運度支大使

盱本有虞兼字

部郎中正玄珪敢以牲酒沈浮海王之神神之聽之我國

家昭列象胥惠養戎貊百蠻率職萬方攸同鮮卑猖狂忘

道悖亂人棄不保王師用征故有度遼諸軍橫海諸

一作之

將天子命我羸糧景從今旌甲雲屯樓船霧集且欲浮碣

石凌方壺襲朔裔即幽都而溟漲

一作漲海

無倪雲濤洄滴孤

山遠島鴻洞天波惟爾肅恭祀

一作令

典導鷁首屏

一作騎

鯨

魚呵風伯遏天吳使蒼猊不驚皇師允濟攘慝剽虐安人

定災蒼蒼羣生非神孰賴無昏汨亂流而作神羞急急  
如律令

弔塞上翁文

居延

蜀本作近

海南四餘百里

闕

南驛

一作有古城焉

土人云是塞上

翁城今為戍其基局趾跡蓋數千年也丙戌之歲兮我征

匈奴恭聞北叟兮託國此都弟尚於

一作尚於子

叟日月遐邁

予

一作及

今來思實獲心契欣問於叟何德其愚

盱本作何德之愚

僻居幽漠浩與世殊忘情逸馬胡寧而知福謝於隣人何



達而不淑丁男既存君子知復人以為極也伊懷茲土既

板且築局禁天崇墉隍雲矗今則蕪一作穢世亦不毓其

何故一作何哉賢叟之德登叟之堂天道何其一本無其字遠而茲

理茫茫人代日故兮丘郭日荒魂魄何家不歸其鄉蜀本作魂

魄何為不歸故鄉吁本作何家獨不歸其故鄉叟乎叟乎我心之傷

### 祭孫府君文

維年日子昂謹以牲酒之奠致祭故延俊府折衝燕然

一本有平字孫府君之靈惟君少馳英武早效成功聲雄塞上名

重關中膽稜威於敵國存大節於家風既揮金而退老方

餌玉

一作藥

於仙童何昊天之不弔隨大化之云

一作長終白

馬故人青鳥送往素車永訣黃墟誰賞醕

一作絮

酒盈觴魂

兮尚饗

為建安王祭苗君文

維某年月日朔方道大總管建安郡王攸宜以酒饌之  
奠祭故壯武將軍左玉鈐衛中候左三軍營主苗君之  
靈君忠勇兼資戎麾夙濟烏丸作逆赤羽從軍方且任

君先鋒仍馳後勁刈鮮卑之壘摧蹋頓之師執馘獻俘  
歸受國賞何圖大勲未立隨命先凋永懷咨嗟情用兼  
慟故命酒奠告爾殤魂君其有靈歆茲薄酌嗚呼尚饗  
祭黃州府君文

維年月日朔孫女夫某等謹以清酌庶羞之奠敢昭告  
於故黃州高府君之靈惟府君含德元亨保和光大才  
堪濟世而運屬承平器元登台而命鍾留落有瑚璉之  
寶無廊廟之資豈圖大位不躋幽靈永昧尊儀潛翳三

十餘年玄殯既開黃腸已古今青鳥改卜丹旌來歸窀  
穸即期幽明永訣某等忝永嘉惠奉事門闡興言追慕  
實增感咽竊惟精意以享黍稷非馨敢陳薄酌以獻明靈  
嗚呼哀哉伏惟尚饗

祭韋府君文

維年月日左拾遺陳子昂謹以少牢清酌之奠致祭故  
人臨海韋君之靈惟君孝友自天忠義由己有經世之  
略懷軌物之量甘心苦節風雨不改常欲窮則獨善其

身達則兼濟天下感激遐詠邈然青雲何期良策未從  
大運奄忽嗚呼哀哉昔君夢奠之時值余冥在叢棘獄  
戶咫尺邈若山河話言空存白馬不弔迨天網既開而  
宿草成列言笑無由夢寐不接永言感慟何時可忘今  
旄旆言歸關河方遠興言永訣今古長辭鄧攸無子天  
道何知洛陽舊陌拱木猶存京兆新阡孤松已植已矣  
帝生云何及矣大運之往聖賢同塵嗚呼哀哉伏惟尚饗

祭宇文夫人文

維年月日朔女夫某謹以清酌嘉蔬之奠奉祭於故高  
氏河南宇文夫人之靈恭聞夫人有清穆之德皓潔之  
行淳懿肅恭內外仰則而遺風素範蕙敷蘭滋用能惠  
心光孚氣氤沼沚宗嚴壺訓芬郁母儀中饋柔嘉娣姒  
有則豈圖慈顏幽翳於今年毫末已拱尊靈廓然今吉  
辰協應幽殯方開容象如在器質已灰改卜禮典宅兆  
方遷山園既列祖載行焉哀子號咷女也嬋媛終天永  
訣泣血流漣某謬承嘉惠預叨姻戚生事早睽送終空

積竊聞精意以享黍稷非馨敢陳薄酌以獻明靈伏惟  
夫人明神尚饗

祭率府孫錄事文

維年月日朔某等謹以

云

古人歎息者恨有志不遂

如吾子良圖方興青雲自致何天道之微時而仁德之  
攸孤忽中年而顛沛從天運而長徂惟君仁孝自天忠  
義由已誠不謝於昔人實有高於烈士然而人知信而  
必果有不識於中庸君不慙於貞純乃洗心於名理元

常既沒墨妙不傳君之逸翰曠代同仙豈圖此妙未極中  
道而息懷衆寶而未攄永幽泉而掩色嗚呼哀哉平生知  
已疇昔周旋我之數子君之百年相視而笑宛若昨日交  
臂而悲今焉已失人代如此天道罔然所恨君者在天當  
年嗣子孤藐貧窶聯翩無父何恃無母惻焉嗚呼孫子山  
濤尚在嵇紹不孤君其知我無恨泉途嗚呼哀哉尚饗

春臺引

寒食集畢

闕

感陽春兮生碧草之油油懷宇宙以傷遠遂登高臺而



寫憂遲美人兮不見恐青歲之遂邁從卑公以酬飲寄  
林塘而一畱採芳蓀於北渚憶桂樹於南州何雲木之  
英麗而池館之崇幽星臺秀士月旦諸子嘉青鳥之辰  
迎火龍之始挾寶書與瑤琴芳蕙華而蘭靡乃掩白蘋  
藉綠芷酒既醉樂未已擊青鐘歌綠水怨青春之萎絕  
贈瑤華之旖旎願一見而導意結衆芳之綢繆曷余情  
之蕩漾獨青雲以增愁恨三山之飛鶴憶海上之白鷗  
重曰羣仙去兮青春頽歲華歇兮黃鳥哀富貴榮樂幾

時分朱宮翠堂生青苔白雲兮歸來

綵樹歌

嘉錦筵之珍樹兮錯衆綵之氛氲壯瑤臺之微月點巫  
山之朝雲青春兮不可逢况蕙色之增芬結芳意而誰  
賞怨絕世之無聞紅榮碧艷坐看歇素華流年不見君  
故吾思崑崙之琪樹厭桃李之繽紛

山水粉圖

仙圖之白雲兮若巫山之高丘紛羣翠之鴻溶又似蓬

瀛海水之周流信夫人之好道愛雲山以幽求

復讎議狀

臣伏見同州下邽人徐元慶者父爽為縣吏趙師韞所殺卒能手刃父讎束身歸罪議曰先王立禮所以進人也明罰所以齊政也夫枕干讎敵人子之義誅罪禁亂王政之綱然則無義不可以訓人亂綱不可以明法故聖人修禮理內飭法防外使夫守法者不以禮廢刑居禮者不以法傷義然後能暴亂不作廉恥以興天下所

以直道而行也竊見同州下邽人徐元慶先時父為縣吏趙師韞所殺元慶鬻身庸保為父報讎手刃師韞束身歸罪雖古烈者亦何以多誠足以激清名教旁感忍辱義士之靡者也然按之國章殺人者死則國家畫一之法也法之不二元慶宜伏辜又按禮經父讎不同天亦國家勸人之教也教之不苟元慶不宜誅然臣聞昔刑之所生本以遏亂仁之所利蓋以崇德今元慶報父之讎意非亂也行子之道義能仁也仁而無利與亂同

誅是曰能刑未可以訓元慶之可顯宥於此矣然邪由正生理必亂作昔禮防至密其弊不勝先王所以明刑本實由此今儻義元慶之節廢國之刑將為後圖政必多難則元慶之罪不可廢也何者人必有子子必有親親親相讎其亂誰救聖人作始必圖其終非一朝一夕之故所以全其政也故曰信人之義其政不行且夫以私義而害公法仁者不為以公法而徇私節王道不設元慶之所以仁高振古義伏當時以其能忘生而及於

德也今若釋元慶之罪以利其生是奪其德而虧其義  
非所謂殺身成仁全死無生之節也如臣等所見謂宜  
正國之法寘之以刑然後旌其閭墓嘉其徽烈可使天  
下直道而行編之於令永為國典謹議

為建安王誓衆詞

諸總管部將旗長隊正各聽命夫聖人用兵以討有罪  
姦慝竊命戎夷不恭則必肆諸市朝大戮原野我皇周  
子育萬國寵綏百蠻遐荒戎狄莫不率職兵屯甲聚非

欲勞人蓋逆不可縱亂不可長所以屈已推轂垂涕泣  
辜誠恐蒼生顛墜塗炭今契丹凶羯敢亂天常為封豕  
長蛇荐食上國玉帛皮幣棄而不貢名器正朔僭而有  
謀乃將紿神虐人暴殄天物故皇帝命我肅將王誅今  
大師已集方將問罪公等諸將及士卒以上須各嚴職  
事肅恭天命契丹凶賊本為中國奴隸昏狂不道勞我  
師徒今與公等及士卒久勤干戈冒犯霜露夫四郊多  
壘士大夫之恥最爾兇狡一劍可屠况皇帝義兵尅期

誅剪此猶泰山壓卵鴻毛在爐今日之伐須如雷霆之  
震虎豹之擊搴旗斬馘掃孽除凶上以據至尊之憤下  
以息邊人之患鼓以作氣旗以應機公等各宜戮力務  
當其任若能奮不顧命陷堅摧鋒金紫玉帛國有重賞  
若進退留顧向背失機斧鉞嚴誅軍有大戮各宜勉勵  
無犯典刑

金門餞東平序

昔者漢朝卿士供帳餞於東都晉國名賢傾城祖於西



郊雖時稱盛觀而人非帝族東平紫微英胄朱邨天人  
蘊岐嶷之瓌姿得山河之寶氣劉君愛士常致禮於幽  
人曹植論文每交歡於數子屬鑾輿拜日來朝太室之  
前玉檢傳刊言返章華之路羣公以眷深王祭思邀祖  
道之歡下走以遇重荀慈謬奉芳筵之醴於時青陽二  
月黃鳥羣飛殘霞將落日交暉遠樹與孤烟共色江山  
萬里渺然荆楚之塗城邑三春去矣伊瀍之地既而朱  
軒不駐綠蓋行遙琴樽之清讌已疲珠玉之芳言未贈

請各陳志以序離襟

梁王池亭宴序

子昂少游白屋未歷朱門聞王孫之游空懷春草見公  
子之興每隔青霄弋陽公座辟青軒飾開朱邸金筵玉  
瑟相邀北里之歡明月琴樽即對西園之賞鄙人幽介  
酒醴知慙王子愛才文章見許白日已馳歡娛難恃平  
生之樂其在茲乎

薛大夫山亭宴序

夫貧賤之交而不可忘珠玉滿堂而不足貴閑門無事  
對黃卷以終年高論不疲逢故人而永夜薛大夫其人  
也下官昔承顏色早蒙車騎之知晚接恩光不異平津  
之舊蔡邕書史許以相資張載文章見稱於代爾其華  
堂別業秀木清泉去朝廷而不遙與江湖而自遠名流  
不雜既入芙蓉之池君子有隣還得芝蘭之室披翠微  
而列坐左對青山俯盤石而開襟右澄流水斟綠酒弄  
清絃索皓月而按歌追涼風而解帶談高趣逸體靜心

閑神渺渺而臨雲思飄飄而遇物林軒寂寞星漢縱橫  
思欲垂汗漫而羣遊與真精而合契歡窮興洽樂往悲  
來悵鸞鶴之不存哀鷦鷯之久沒徘徊永歎慷慨長懷  
東方明而畢昴升北閣曙而天雲靜悲夫向之所得已  
失於無何今之所遊傷羈於有物詩言志也可得聞乎

送中嶽二三真人序

時龍集乙未十  
二月二十日

夫愛名山歌長往世有之矣放身霄嶺宴景雲林卑俗  
不可得而聞時事不可得而見則吾欲高視終古一笑

昔人嵩山有二仙人自浮丘公王子晉上朝玉帝遺迹  
金壇鳳簫悠悠千載無響吾每以是臨霞永慨撫膺歎  
息常謂烟駕不逢羽人長往去翫世走青雲登玉女之  
峰窺石人之廟見司馬子微馮大和蛻裳渺然冥壑獨  
立真朋羽會金漿玉液則有楊仙翁玄默洞天賈上士  
幽棲北谷玉笙吟鳳瑤衣駐鶴方且迷軒轅之駕期汗  
漫之遊吾亦何人恭接茲賞實欲執青節從白蜺陪飲  
崑崙之庭觀化玄元之府宿心遂矣冥骨甘焉豈知瓊

都命淺金格道微攀倒景而迷途顧中峰而失路塵縈  
俗累復汨吾和仙人真侶永幽靈契翳青芝而延佇遙  
會何期結丹桂而徘徊遠心空絕紫煙去黃庭極仰寥  
廓而無光視寰區而寡色悠悠何往白頭名利之交咄  
咄誰嗟玄運盛衰之感始知楊朱岐路墨翟素絲尚平  
辭家而不歸鮑焦抱木而枯死可以慟可以悲古人之  
心吾今得之也

送著作佐郎崔融等從梁王東征序

古者涼風至白露下天子命將帥訓甲兵將以外威荒  
戎內輯中夏時義遠矣自我大君受命百蠻蟻伏匈奴  
含蒲桃之宮越裳重翡翠之貢虎符不發象胥攸同實  
欲高議靈臺偃伯天下而林胡遺孽蓬亂邊氓驅蚊蚋  
之師忽雷霆之伐乃竊海裔弄燕陲皇帝哀北鄙之人  
罹其辛螫以東征之義降彼偏裨猶恐威令未孚亭塞  
仍梗乃謀元帥命佐軍得朱邸之天人乃黃閣之元老  
廟堂授鉞鑿門申命建梁國之旌旗吟漢庭之簫鼓東

向而拜北道長驅蜺旌羽騎之殷戈翻落日突鬚蒙輪  
之勇劒決浮雲方且獵火九都窮蹋頓存肅慎弔姑餘  
彷徨赤山巡御日域以昭我王師恭天討也歲七月軍  
出國門天晶無雲朔風清海時比部郎中唐奉一考功  
員外郎李迴季著作佐郎崔融竝叅帷幕之賓掌書記  
之任燕南悵別洛北思懽頓旌節而少留傾朝廷而出  
餞永昌丞房惠玄衣冠之秀乃張蕙圃席蘭堂環曲榭  
羅羽觴寫中京之望縱候亭之賞爾乃投壺習射博奕



觀兵鎗金饒憂瑤琴歌易水之慷慨秦關山以徘徊頽  
陽半林微陰出座思長風以破浪恐白日之蹉跎酒中  
樂酣拔劍起舞則已氣橫遼碣志掃獯戎抗手何言賦  
詩以贈

送吉州杜司戶審言序

嗟夫德則有隣才不必貴昔有耕於巖石而名動京師  
詞感帝王乃位昇武騎夫豈不遭昌運哉蓋時命不齊  
奇偶有數當用賢之世賈誼竄於長沙居好文之朝崔

駟放於遼海況大聖提象羣臣守規杜司戶炳靈翰林  
研幾策府有重名於天下而獨秀於朝端徐陳應劉不  
得廁其壘何王沈謝適足靡其旗而載筆下寮三十餘  
載秉不羈之操物莫同塵含絕唱之音人皆寡和羣公  
愛襍衡之俊留在京師天子以桓譚之非謫居外郡蒼  
龍闔茂扁舟入吳告別千秋之亭迴棹五湖之曲朝廷  
相送駐旌蓋於城隅之子孤游淼風帆於天際白雲自  
出蒼梧漸遠帝臺半隱坐隔丹青巴山一望魂斷淶水

於是邀白日藉青蘋追瀟湘之游寄洞庭之樂吳歛楚  
舞右琴左壺將以緩燕客之心慰越人之思杜君乃挾  
琴起舞抗手高歌哀皓首而未遇恐青春之蹉跎且欲  
攜幽蘭結芳桂歛石泉以節味詠商山以卒歲返耕餌  
朮吾將老焉羣公嘉之賦詩以贈凡四十五人具題爵  
里闕含絕類選作  
合絕

冬夜宴臨邛李錄事宅序

下官遊京國久矣接軒裳衆矣池臺鐘鼓雖有會於終

朝琴酒管絃未窮歡於永夕豈非殊我親愛異我風謠  
而使臨臺有懷聞樂增歎者也何功曹舊州耆老迹尚  
於沈寔李錄事吾土賢豪義多於游俠高軒置酒甲第  
迎賓絲竹紛於綺窓琅玕盛於雕俎樓臺若畫臨故國  
之城池軒蓋如雲總名都之車馬於是乘興自此而遊  
安得不放意畱歡遺老忘死金壺漏晚銀燭花微北林  
之烟月無光南浦之星河向曙赤車使者下官雖謝於  
古人錦里名家群公豈慙於昔彥我之懷矣實在於斯

同賦一言俱為四韻

忠州江亭喜重遇吳叅軍見牛司倉序

日月交分春秋代謝昔歲居單閼適言別於茲都今龍  
集昭陽復相逢於此地山川未改容貌俱非叙名宦而  
猶嗟問鄉關而不樂雲天遂解琴酒還開新交與舊識  
俱歡林壑共煙霞對賞江亭迴瞰羅新樹於階基山榭  
遙臨列羣峰於戶牖爾其丹藤綠篠俯暎長筵翠渚洪  
瀾交流合座神融興洽望直情高覺清溪之仙洞不遙

見滄海之神山乍出既而行舟有限嗟此會之難留別  
日無期歎分歧之易遠徘徊北渚惆悵南津江陵之道  
路方賒巴徼之雲山漸異嗟乎離言可贈所願保於千  
金別曲何謠各請陳於五字

暉上人房餞齊少府使入京府序

永淳二年四月孟夏東海齊子官於此州雖黃綬位輕  
而青雲器重故能委邦君而坐嘯屈刺史而知名屬乎  
鑾駕巡方諸侯納貢將欲對揚天子命我行人執玉帛

而當朝擁駢駢而戒道指途河渭發引岷嶬粵以丙丁  
之日次於暉公別舍蓋言離也爾其巖泉列坐竹樹交  
筵吐青藹於軒窓栖白雲於左右參差池榭亂山水之  
清陰繚繞階庭雜峰崖之異勢入禪林而避暑肅風景  
於中庭開水殿而追涼徹氛埃於戶外瑤琴合奏翠管  
時行譚窈窕於天人極畱連於晷刻既而歡樂極良辰  
征攀白日而不迴唱浮雲而告別山光黯黯凝綠樹之  
將曛嵐氣沈沈結蒼雲而遂晚雖同交未阻風月可畱

岐路方乖關山成恨嗟乎朝廷子入期富貴於崇朝林  
嶺吾棲學神仙而未畢青霞路絕朱紱途遙言此會之  
何時願相逢而誰代永懷千古豈知仁者之交凡我三  
人盡崇不朽之迹斯文未喪題之此山同疏六韻云爾

春晦餞陶七於江南序

蜀江分袂巴山望別南津坐恨歎仙帆之方遙北渚長  
懷見離亭之欲晚白雲去矣黃鶴何之楊柳青而三春  
暮我之懷矣能無贈乎同賦一言俱題四韻



夏日暉上人房別李叅軍序

考察天人旁羅變動東西南北賢聖不能定其居寒暑  
晦明陰陽不能革其數莫不雲離雨散奔馳於宇宙之  
間宋遠燕遙泣別於關山之際自古來矣李叅軍白雲  
英胄紫氣仙人愛江海而高尋頓風塵而未息來從許  
下月旦出於龍泉言入蜀中星文見於牛斗野亭相遇  
逆旅承歡謝鯤之山水暫開樂廣之雲天自樂思道林  
而不見悵若有亡詣祇樹而從遊衆然舊款高僧展袂

大士臨筵披覺路之天書坐琉璃之寶地簾帷後闢拂鷗  
鵠之香林欄檻前開照芙蓉之綠水討論儒墨探覽真  
玄覺周孔之猶迷知老莊之未悟遂欲高攀寶坐伏奏  
金仙開不二之法門觀大千之世界歡娛恍晚離別行  
催紅霞生而白日歸青氣凝而碧山暮驪歌斷引抗手  
將辭江漢浩浩而長流天地居然而不動嗟乎色為何  
色悲樂忽而因生誰去誰來離會紛而妄作俗之迷也  
不亦煩乎各述所懷不拘章韻

秋日遇荆府崔兵曹使讌序

若夫尊卑位隔榮賤途分使卿士大夫倚軒裳而傲物  
山栖木食負林壑而驕人未有能屈富貴於沈冥雜薜  
蘿於簪笏天人坐契相從雲霧之遊風雨不疲高縱琴  
樽之賞崔兵曹紫庭公胄青雲貴人以鍾鼎不足致奇  
才烟霞可以交名士皇華昭國懷鳳綽而高尋白桂追  
遊邀兔置而下顧大矣哉生平未識一見而交道遂存  
此日披懷千載之風期坐合支道林之雅論妙理沈微

崔子王之雄才斯文未喪屬乎金龍掌氣石鴈驚秋天  
沈寥而煙日無光野寂寞而山川變色芸其黃矣悲白  
露於蒼葭木葉落兮慘紅霜於綠樹爾其高興洽芳酒  
闡頓羲和而不畱顧華堂而欲晚長歌何託思傳稽古  
之文爰命小人率記當時之事人採一字六韻成篇  
喜遇冀侍御崔司議二使序

昂獨坐一隅孤憤五蠹雖身在江海而心馳魏闕歲時  
仲春幽卧未起忽聞二星入井四牡臨亭邀使者之車

乃故人之駕隱機一笑把臂入林既聞朝廷之事復此  
琴樽之樂山林幽疾鐘鼎舊遊語默譚詠今復一得況  
北堂夜永西軒月微巴山有望別之嗟洛陽無寄載之  
客江關離會三千餘里名位寵辱一百年中歡娛如何  
日月其邁不為目前之賞以增別後之思蟋蟀笑人夫  
子何歎

別冀侍御崔司議序

朝廷歡娛山林幽痾思魏闕魂已九飛飲岷江情復三

樂進不忘匡救於國退不慚無悶在林冀侍御崔司議  
至公至平許我以語默於是矣夫達則以公濟天下窮  
則以大道理身嗟乎子昂豈敢負古人哉蜀國酒醴無  
以娛客至於挾清琴登高山白雲在天清江極目可以  
散孤憤可以遊太清為一世之逸人寄千里之道友吾  
欲不謝於崔冀二公矣所恨酒未醉琴方清王事靡盬  
驛騎遄速不盡平原十日之飲又謝叔度累日之歡雲  
山幽幽歎不及也載想房陸畢子為軒冕之人不知蜀

山有雲巴水可興睽闕良會我心惄然請以此酣寄謝  
諸子為巴山別引也陳子昂醉詞曰有道君匡國無悶  
余在林白雲岷峩上歲晚來相尋

洪崖子鸞鳥詩序

鸞鳥篇者晉人洪崖子之所作也洪崖子遁我玄魁賁  
其默行矯迹汾水習隱洛陽乘白驢衣羽褐遊朝市之  
際雜縉紳之間時人或將襲青牛師薊子訓之陳迹也  
嘗以翠鸞時棲明主之瑞君子獨立矯世之方於是和

墨澹情灑翰縟意寄孤興於露月沈浮標於山海乃集  
瑤圃洗玉池翩翩然又以自得也時尚輦奉御梁國喬  
侶聞其風而悅之乃刻羽翦商飛毫揆牘扣歸昌之律  
協朝陽之音率諸君子屬而和之者十有五余始未知  
夫洪崖也喬子慕義命余叙之凡若干首

登薊城西北樓送崔著作入都序

僕嘗倦遊傷別久矣况登樓遠國銜酒故人僨胡孽之  
侵邊從王師之出塞元戎按甲方刈鮮卑之壘天子賜



書且有相君之召而崔侯佩劍即謁承明羣公負戈方  
絕大漠燕山北望遼海東浮雲臺與碣館天殊亭障共  
衣冠地隔撫劍何道長謠增歎以身許國我則當仁論  
道匡君子思報主一作國仲冬寒苦幽朔初平蒼茫天兵  
之氣冥滅戎雲之色白羽一指可掃九都赤墀九重佇  
觀獻凱闕遂君之恩共有策勛飲至方同

廊廟之歡偃武橐弓借爾文儒之首薊丘故事可以贈  
言同賦登薊樓送崔子云爾

送麴郎將使默啞序

蓋北夷不羈之日久矣天子垂玄默穆皇風而狼居革  
心蟻伏請職歲一月上將恤戎乃以金章假麴公為司  
賓卿載馳錦車諭意雲幕且欲頓單于之膝受呼韓之  
朝不踰青春復命紫闕其忠臣烈士之節感激壯矣朝  
廷以赴此絕國追送近郊登熊山望鴈塞黃雲千里亭  
皋悠然僉曰賦詩絕句以贈

嘉一作喜馬叅軍相過醉歌序

吾無用久矣進不能以義補國退不能以道隱身天子  
哀矜居於侍省且欲以芝桂為伍麋鹿同曹軒裳鍾鼎  
如夢中也南榮暴背北林設置有客扣門云吾道存孺  
子孺子黃中通理時玄冬遇夜微月在天白雲半山志  
逸海上酒既醉琴方清陶然玄暢浩爾太素則欲狎青  
鳥寄丹仙矣日月云邁蟋蟀謂何夫詩可以比興也不  
言曷著時醉書散灑乃昏見清廟臺令知此有蜀雲氣  
也畢大拾遺陸六侍御崔議司崔兵曹鮮于晉崔洎子

懷一道人當知吾此評是實錄也若東萊王仲烈見之  
必以為真醉歌曰獨幽默以三月兮深林潛居時歲忽  
兮孤憤遐吟誰知我心孺子孺子其可與理分

偶遇巴西姜主簿序

予疲於永久未嘗解顏正欲登高山望遠壑揮斥幽痾  
以劇太清姜主簿倏自綿中至於林下乃飾琴酒之事  
雜文章之娛將蠲我憂頽靡取樂夫浩浩之白不可獨  
也青春之詩又誰咎也逢太平之化寄當年之歡同人

在焉而我何歎南國橘柚陽月初榮北梁山水良辰復  
別揮手何贈詩以永言云爾

餞陳少府從軍序

夫歲月易得古人疾沒代不稱功業未成君子以自強  
不息豈非懷其寶思其用然後以取海內之名以定當  
年之策展其才力受以驅馳少府叔鳳彩龍章才高位  
下班超遠慕每言關塞之勲梁竦長懷恥為州縣之職  
屬胡兵犯塞漢將臨邊商君用耕戰之謀充國起屯田

之策皇華出使言收疆場之功白水開筵遂為雲雨之  
別爾其蒼龍解角朱鳥司辰潯景薰天炎光折地山川  
漸遠行人動游子之歌罇酒未空送客起貧交之贈嗟  
乎楊朱所以泣岐路蘇武所以悲絕國古之來矣盍各  
言志以叙離歌

荊州大崇福觀記

維大周揖讓受唐有天下十載施化育德揚光顯仁天  
下咸和中外胥謐僊門法寓澤罔不暨粵若無上太祖

孝明皇帝神明睿哲龍德而隱君子勿用于我諸宮歲  
粧春風霖霖時雨謳歌歸之允矣太王王季岐鎬之漸  
也於戲西伯潛聖而遺其三齡故我太祖姑安時處順  
乘彼白雲以歸帝鄉方域之人嗟咨涕洟靈魄罔邁迺  
以珠襦玉匣閔茲衣冠穀林方崇喬山未掩龍輶梓寢  
在茲觀者七月焉餘滅化北顏塗墜積逮皇帝順人樂  
推鳳翔虎變追革顯號宗祀于明堂躍試所歷莫不昭  
晰寵光也長史弘農楊元琰雅量川濬貞節嶽立有倚

相墳典之博子囊增名之忠遂稽皇圖徵文獻以為會稽之廟大庭之初其事尚矣乃表上遺跡祈飾山階司賓卿于惟謙地官主事魯玄傑咸經沐浴邦憲昇官周京亦恢廓徽猷任佐誠請時皇帝方垂拱璇淵之中以思大化故書奏不荅道士孟安排者玄稟真骨記上階黃裳羽袂囊中竊感蒼梧遺化長沙舊寢不可以不昭發聖世復重理前狀伏奉闕下至于再三天子乃憫然遷思迴慮旌別斯觀錫名曰大崇福焉時龍集己亥聖



歷之二年也翌日又優制褒崇時降銀榜仙書鳳篆飛  
集王宮天文昭回瑞我鄢郢則有踰岐山越梁境梯衡  
霍浮瀟湘鬱荆門龐江徼莫不翼戴抃舞澡雪心目者  
已安排乃喟然嘆曰道惡乎在名惡乎在茅茨文軒未  
始離也朱宮玄圃未始乖也損之而又損之思乎思無  
為而無不為知乎知則我何拘於常見哉而不謂熙帝  
庸也遂經玄都爰伐琴瑟作為仙觀之宮文彩構檻砮  
砮砌階櫨栱森鬱以宏合藻井翕赭以天開瑤壇躋於

上清銀闕表於中界高步玄雲肅然靈風髣髴紫陽之  
天也然後璇題顯曜金格道相朝浮彩雲夕泣清露眇  
哉邈乎信皇靈之所感發矣蓋金簡玉牒可存而不可  
知崑崙方壺可聞而不可階也猶且曰道錄貴乎真經  
況皇明帝載昭鑠日月而已乃刊作記以傳罔極

陳拾遺集卷七